



# **PRIMEIRU MINISTRU**

**ALOKUSAUN  
SUA EXELÉNSIA KAY RALA XANANA GUSMÃO NIAN  
PRIMEIRU-MINISTRU & PESOA EMINENTE g7+**

**SALVAGUARDA PAZ IHA TEMPUS TURBULENTUS  
(KATAK IHA KONFUZAUN LARAN): VIZAUN BOOT g7+  
NIAN**

**REUNIAUN MINISTERIAL DANEEN g7+**

Díli, Timor-Leste

11 April 2025

**Ha'u nia Nai Prezidente Repúblika**

**Exelénsias**

**Prezidente Parlamentu**

**Ministra Planeamentu no Dezenvolvimentu Ekonómiku Serra Leoa nian no Prezidente g7+**

**Ministrus no Representantes husi países g7+**

**Membrus husi Parlamentu Nasionál**

**Membrus husi Korpus Diplomátikus**

**Membrus husi Akademia, Setor Privadu no Sosiedade sivíl**

**Señoras no Señores**

Sente laran haksolok tebetebes bele hato'o boas-vindas ba ita-boot sira iha Dili, g7+ nia uma.

Tinan sanulu-resin-lima liubá, ha'u hamriik iha palku ida-né hanesan Primeiru-Ministru Timor-Leste, hodi hato'o diskursu iha g7+ nia sorumutu dahuluk. Iha tempu ne'ebá, ita-nia grupu seidauk rekonhesidu formalmente, no ita-nia asosiasaun menusde metade kompara ho ohin. Sudaun-du-Sul seidauk hetan nia independénsia no Timor-Leste foin mak hanesan nasaun joven liuhotu iha mundu. **Maibé, maski ita iha hela sirkunstánsias frájeis, ita bele halibur malu ho vizaun ida ne'ebé barani lahalimar – vizaun kona-ba paz, reziliénsia ho direitu husi ita-nia países atu tau-matan rasik ba ita-nia destinus.**

Husi kedan inísiu, ha'u fiar katak grupu ne'e iha potenciál atu sai boot tan – la'ós de'it iha númeru, maibé iha influénsia. Ha'u insiste katak ita tenke kontinua habelar-an liután, institusionaliza ita-nia esforsus no hametin ita-nia kbiit atu armoniza no alinha assisténsia internasionál ho ita-nia prioridades, hodi nuné garante katak bele atende duni nesesidades reais ita-nia povu tomak nian, einvezde dita tuir fali agendas husi li'ur.

g7+ moris tanba luta ita hotu nian — husi paíz sira ne'ebé hasoru funu, instabilidade ho intervensoens husi li'ur ne'ebé dala barak la lori paz ba tempu naruk. Ita fó liman ba malu hodi hadi'a efikásia iha ita-nia sistema kona-ba ajuda global, kompartilha lisoens ba malu no tulun malu harii modelu dezenvolvimentu foun ida ne'ebé gia (ka, orienta) ho vizaun ida kona-ba paz no autokonfiansa ba tempu naruk.

Maski mai husi jeografias, kulturadas ho sistemas polítikus ne'ebé la-hanesan, ita hamutuk tanba iha hanoin ne'ebé hanesan: **katak susesu atu halo, harí no hametin paz depende ba ita hotu nia kapasidade atu kontrola ita-nia trajetória (ka, dalan) rasik.**

Tinan ida depoizde primeira reuniaun, ha'u halo viajen ba Juba, Sudaun-du-Sul, ba segunda reuniaun G7+ - "G7+ nia retiru ida ". Iha époka ne'ebá, Sudaun-du-Sul foin mak hetan independénsia. Ha'u bele haree iha nia povu aspirasaun ba prosperidade hanesan mós ha'u haree iha Timor-Leste, liutiha ami-nia luta naruk. Sira-nia determinasaun ba futuru ida ne'ebé nabilan liu mak reafirma ita-nia misaun koletiva: **atu garante katak labele trata ita-nia países hanesan problema sira atu rezolve, maibé hanesan nasaun sira ho potenciál atu lidera sira-nia transformasaun rasik.**

Ami fila husi Juba ho laran haksolok boot tebes, ho determinasaun atu muda sistema kona-ba ajuda internasionál, ne'ebé kleur tebes ona falha iha ita-nia nasaun sira. Iha duni tinan ne'ebá, ami endosa New Deal (ka, Akordu Foun) ida ba envolvimentu iha estatus frágeis, estrutura ida ne'ebé hakarak muda dinámika podér iha kooperasaun internasionál – hodi fó ba estadu sira ne'ebé afetadus husi konflitu, kontrolu tomak iha sira-nia prosesus kona-ba konstrusaun paz ho dezvoltamentu. Ne'e mak tenke remodela narrativa global, hodi garante katak ita-nia paíz sira la hanesan de'it reseptores (ka, simu-na'in) ajuda, maibé hanesan hotu parseirus iha sira-nia dezvoltamentu.

New Deal né hanesan konkista boot ida, ne'ebé influencia ajenda dezvoltamentu globál no lori ba inkluziun objetivu independente iha iha paz (SDG 16) iha ajenda 2030. **Maibé, maski ho susesu ne'e, komportamentus husi instituisoens internasionais ho países doadores la muda.** Arkitetura ajuda kontinua kesi-metin iha modelus dezatuizadus – hodi hamosu frajilidade einvezde tulun paíz sira supera (ka, ultrapasa).

Ho sorumutu ida-ne'e liutiha tinan 15, G7+ sai hanesan plataforma ida ne'ebé forte no estruturada di'ak liu, ho Karta formal ida no estatutu hanesan Observador iha Nasoens Unidas. Ne'e hanesan impaktu boot tebetebes iha diskursu polítika globál, hodi hetan rekonhesimentu hanesan lian maka'as no influente ida ba paíz sira ne'ebé afetadus husi konflitus. Liuhusi aprendizajen ho kooperasaun entre pares, promove ona solidariedade ho fahe-ba-malu konhesimentu entre nia membru sira, hodi hametin ita-nia kapasidadee koletiva atu nani hasoru dezafius. Realizasaun hirak-ne'e, hamutuk ho marku sira seluk ne'ebé Sekretariadu G7+ sei hatudu ohin, hanesan prova ida kona-ba ita-nia unidade, reziliénsia ho kompromisu metin ba kauza grupu ne'e nian. **Ha'u rekomenda dedikasaun husi Estadu-Membru sira hotu ho esforsus ne'ebé la lahatene kole husi Sekretaria, ne'ebé nia knaar fundamentál tebes ba ita hotu-hotu nia vizaun.**

Entretantu, enkuantu ita hasoru malu iha-ne'e hodi halo revizaun ba ita-nia progresu, ita tenke husu ba ita-nia an rasik: Oras ne'e ita-nia paíz sira iha ona ne'ebé? Sistema internasionál evolui hodi servi di'ak liu paíz sira ne'ebé iha situasoens frájeis ka ita sei luta nafatin hasoru dezafiu hirak-ne'e? Diresaun ida ne'ebé loos mak ita tenke tuir iha ita-nia jornada koletiva ne'e ba oin?

## **Triste realidade mak ida-ne'e, maski g7+ iha ona influénsia maka'as, mundu iha nafatin turbulénsia (ka, konfuzaun laran) no kontinua turbulentu.**

Konflitu sira sai naruk no aat liután. Dezigualdade ho instabilidade polítika kontinua hamosu krizes foun. Emerjénsia klimátika sai tiha hanesan ameasa ba umanidade nia sobrevivénsia, hodi aumenta hamlaha, dezlokasaun ho redusaun rekursus. Insituisaun sira ne'ebé tuir loloos salvaguarda paz global mak la konsege hasoru dezafiu hirak-ne'e. Einvezde servisu ba mundu ida ne'ebé justu no inkluzivu nasaun forte no boot sira kontinua halo polítikas globais ho baze iha sira-nia intereses estratéjikus rasik, enkuantu maioria países iha emisfériu sul kontinua marjinalizada (ka, tau ketak tiha).

Exlénsias,  
Belun sira  
Señoras no señores,

Iha 2013, ha'u hala'o ha'u-nia segunda misaun iha Sudaun-du-Sul. Aleinde reunioens ho líderes paíz né nian, ha'u vizita aldeia Malou, iha estado Jonglei, ne'ebé governu Timor-Leste fó osan uitoan ba konstrusaun eskola primária ida. Dala ida tan, ha'u sente komovidu haree sira-nia reziliénsia no determinasaun metin lahalimar ba paz ho estabilidade,maski ho difikuldades ne'ebé sira hasoru

Maibé, iha esperansa ne'e nia kotuk, ita bele sente tensaun polítika ho laran ta'uk tebes tanba krize boot ida besik daudaun ona. Ha'u halo apelu ida ba líderes Sudaun-du-Sul nian atu sira halo buat hotu-hotu tuir sira-nia kbiit atu evita konflitu nia abut sai metin liután. Husi experiénsia todan boot Timor-Leste nian, ha'u hatene oinsá difísil lahalimar harii hikas paz bainhira nasaun ida tama iha gerra sivil. Ha'u aviza ba sira katak, karik mak mosu konflitu, sei lori tinan barak, bele sanulu ka ruanulu-resin, hodi hetan fali estabilidade no sei selu karun tanba ema barak sei lakon sira-nia moris.

Trájiku tebes, tanba la kleur ida, depoizde ha'u-nia vizita, Sudaun-du-Sul mout iha konflitu boot laran — funu ida ne'ebé dada naruk tinan hira laran, husik hela ema rihun-ba-rihun mate, dezlokasaun barak tebes, hamlaha no moris-kiak ne'ebé aumenta ba beibeik.

Ha'u partisipa iha segundu retiru ministerial g7+ iha Haiti iha 2012, paíz ida ne'ebé kleur tebes ona terus tanba instabilidade polítika, dezastres naturais ho difikuldades ekonómikas. Durante ha'u-nia vizita, ha'u bele haree rasik dezeju (ka, karan) ne'ebé hanesan iha parte hotu-hotu husi sosiedade haitiana — kona-ba paz, estabilidade ho oportunidade atu harii hikas nasaun ne'e. Maski ho dezafius iha governasaun, krizes iha seguransa ho dezastres umanitárius to'o oras ne'e, reziliénsia povu haitianu nian kontinua metin. Maibé, hanesan ho ita sira-ne'e nia nasaun, husik mesak hela Haiti ba intervensoens externas ne'ebé, dala barak, la konsege haree kauzas bázikas husi

nia fragilidade. Ha'u insiste atu sira-nia líder sira kontrola sira-nia dalan rasik, hodi sublinha katak unidade ho propriedade nasional mak hanesan únika forma atu hakotu ho siklu instabilidade.

Ha'u lidera misaun ba Giné-Bisau iha 2014 — país ida ne'ebé comunidade internasional husik mesak hela — atu partilha ami-nia experiéncias kona-ba paz ho demokrasia ne'ebé utiliza prinsipius g7+. Ha'u lori mensajen kona-ba paz, hodi defende estabilidade ho demokrasia. Ha'u repete apelu ne'ebé hanesan ba líder sira atu respeita vontade povu nian no hadook an husi meius antidemokrátikus atu hetan poder.

Ha'u mós lidera misoens g7+ nian iha Repúblika Sentru-Afrikana (RSA) iha 2014 no 2015 hodi tulun fasilita diálogu entre fasoens iha funu, ho baze iha ami-nia experiéncias kona-ba rezolusaun konfliktus ho rekonsiliaun, Ha'u hasoru malu ho sidadauns, comunidades dezlokadas no líderes husi grupus opozitores — sira hotu partilha aspirasaun ne'ebé hanesan: mak paz ho estabilidade iha sira-nia país. **Sira-nia lian klaru tebetebes; Sira hakarak atu hapara lailais violénsia ne'ebé sobu sira-nia nasaun.**

Hanesan rezultadu husi ami-nia esforsus, bele harii Fórum Bangui — plataforma ida ne'ebé halibur parte sira hotu ne'ebé interesadas atu hametin hikas kompromisu ba paz. Prosesu ne'e mak rezulta iha akordu ida ne'ebé inklui dispozisoens importantes hanesan dezarmamentu, desmobilizasaun, reintegrasaun ho repatriamentu — hanesan pasus esensiais hodi hakotu siklu konfliktu.

Atu garante katak kompromisu hirak-ne'e bele implementa, ami buka apoiu husi doadores bilaterais no multilaterais. Ami tuku oda-matan Banku Mundial ho instituisoens internacionais seluk, hodi halo apelu maka'as kona-ba asisténsia finanseira atu tulun país órfaun ne'e ne'ebé la hetan ajuda, maibé riku iha rekursus, ho nia povu. Dala ida tan einvezde asaun, ami hasoru atrazus burokrátikus ho indiferensa. **Iha promesas, maibé apoiu konkretu hanesan nafatin iluzaun — lembrete klaru ida kona-ba falhas iha sistema ajuda hodi fó resposta bainhira Estadu frájlil sira presiza liu.**

Durante ami-nia enkontru iha Kabul, no Afeganistaun, iha 2016, ha'u lori experiéncias kona-ba diálogu nasional ba rekonsiliaun ne'ebé fundamentais tebes iha estabilizasaun nasaun sira seluk ne'ebé hasoru konfliktus. Iha 2016, iha Reuniaun Ministerial g7+, ha'u partilha lisaun hirak-ne'e ho líderes husi Afeganistaun, hodi sublinha katak rekonsiliaun ho diálogu inkluzivu hanesan dalan úniku ba paz ne'ebé sustentável.

Halo tiha Reuniaun Ministerial, ha'u halo nafatin diskusoens bilaterais ho responsáveis governu afegaun, hodi husu ba sira atu hahú ona diálogu nasional jenuínu ida, ne'ebé inklui fasaun sira hotu ho lian husi sosiedade afegán. Ami defende maka'as diálogu intra-afegaun, prosesu ida ne'ebé permite país ne'e kontrola nia esforsus rasik ba paz

einvezde depende ba solusoens husi li'ur. Ami apela mós ba comunidade internasionál atu apoia esforsu ne'e, hodi alerta katak, se la iha prosesu ida ba rekonsilisaun hanesan propriedade lokál, mak futuru Afeganistaun sei nakukun nafatin.

**Maibé ami-nia apelu sira monu iha ema tilun diuk sira. Komunitade internasionál metin nafatin ho nia abordajen rasik, lakohi rekonhese katak rezolusoens ne'ebé impoin husi li'ur sei la lori paz duradoura (ka, naruk).** Einvezde rona povu Afegaun nia lian, ne'ebé terus tinan sanulu-ruanulu-resin tanba funu, instabilidade ho intervensoens estranjeiras, poténsia global sira buka mak sira-nia intereses rasik, no trata Afeganistaun hanesan peapun ida iha jogus jeopolítikus, einvezde hanesan nasaun ida ho direitu atu determina nia destinu rasik.

Liutiha tinan 20 ne'ebé temi dehan "funu hasoru terrorismu", ikusliu husik hela Afeganistaun ba nia destinu rasik. Atores internasionais ne'ebé uluk justifika intervensaun lori estabilidade naran, hadook-an, soe hela ba kotuk inserteza, sofrimentu ho luta rohan laek ba paz. Ne'e hanesan lembrete dolorozu ida ne'ebé, bainhira paz ne'e dita (ka, impoin) husi forsas externas no la'ós tanba vontade povu ida nian, mak destinada ona atu la dura kleur.

Ha'u vizita Repúblika Demokrátika Kongu (RDK) no ha'u impresionadu tebetebes tantu ba reziliénsia husi sira-nia povu komu potenciál boot lahalimar nasaun ne'e nian ne'ebé seidauk explora. **Ne'e país riku boot tebes iha rekursus naturais, país ida ne'ebé, karik mak iha oportunidade, bele dududu dezenvolvimentu rejiaun tomak ne'ebé hadulas.** Nia rikeza mineral ne'ebé boot lahalimar, rai riku ho pozisaun estratéjika tuir lolós halo nasaun ne'e sai ona hanesan pilar ba estabilidade ho prosperidade iha África.

Maibé, einvezde prosperidade, RDK nakonu ho konfliktus no explorasaun. Triste tebes haree oinsá nasaun ida boot hanesan ne'e sai vítima tanba ganánsia global, ne'ebé empresas multinasionais, poténsias externas ho intereses pesoais buras iha ninia instabilidade laran. Einvezde promove dezenvolvimentu, sira ke'e sai hotu rikusoin husi rai einkuantu husik hela sira-nia ain-fatin nakonu ho destruisaun.

**Ohin-loron rejiaun leste RDK continua mout iha violénsia, konfliktu ida ne'ebé nia abut la'ós de'it husi kestoens internas, maibé mai husi actores externus ho rivalidades rejionais.** Nia povu nia sofrimentu la'ós hanesan asidente, maibé konsekuénsia husi explorasaun deliberada no tanba negligensia (ka, indiferensa) husi comunidade internasionál.

Maski líder mundial sira halo deklarasoens hodi kondena, maibé sira-nia liafuan la hatudu kualkér asaun, kualkér kompromisu real hodi hakotu ho sofrimentu ema inosente ria. RDK, hanesan ita sira-ne'e barak nia nasaun, continua sai hanesan ezemplu ida klaru tebetebes kona-ba oinsá Estadu frajil sira ema husik mesak hela ba sira-nia sorte einkuantu poténsias globais prioriza mak sira-nia intereses rasik hodi

prejudika paz no estabilidade. Ne'e mak realidade triste ida ne'ebé ita tenke hasoru no tanba ne'e mak g7+ tenke kontinua luta ba mundu ida ne'ebé ita-nia paiz sira labele sai tan peons iha jogus ba poderozu sira, maibé arkitektus ba sira-nia futuru rasik.

Ha'u acompanha besik lós perkursus (ka, dalan) ne'ebé paizes seluk membrus g7+ liu daudaun, hodi haree tantu progresu komu difikuldades ne'ebé sei hasoru nafatin. Ha'u bele kongratula tanba haree Somália hakat tuir dalan ba autosufisiénsia, hodi liberta nia an neineik, husi siklu dependénsia internasional. Reziliénsia husi nia povu ho determinasaun husi nia lideransa hodi defende soberania kona-ba nia dezvoltamentu ho seguransa ita tenke louva.

Nuné'e mós, ha'u kontinua preokupadu tebetebes ho lémen, nasaun ida ne'ebé dadur metin hela iha fogu kruzadu laran tanba rivalidades ejemónikas. Buat ne'ebé uluk hanesan rai ida ho istória boot no kultura, sai tiha ona ba kampu-de-batalha ba intereses externus, husik nia povu terus tanba impaktu husi funu, hamlaha ho dezlokasaun. Sofrimentu lémen hanesan lembrete klaru ida kona-ba oinsá paiz sira ne'ebé hasoru konflitus sai hela de'it hanesan arenas ba disputas geopolíticas invezde reseptores apoiu jenuínu ba paz ho estabilidade.

Ita-nia paiz hira tan mak tenke terus molok mundu rona ita?

Agora ita tenke husu ba ita-nia an rasik: ita kontinua hein atu mundu ne'e muda ka ita mak kontrola rasik ita-nia futuru?

To'o ona tempu atu simu lia-loos maski todan: sistema global ne'ebé lidera husi nasoens poderozas (ka, kbiit boot sira) falha tiha ona ho ita dala barak, sura mak la bele. **Maibé, hanesan líderes, ita mós tenke rekonhese ita-nia responsabilidade rasik no atua hamutuk.** Ita-nia paiz nia destinu la iha ema seluk nia liman, maibé iha ita-nia liman rasik. Ita tenke hanoin atu servi ita-nia povu ho pasiénsia, dedikasaun no hakraik-an.

Iha kontektu ida-ne'e mak ha'u fiar tebetebes katak **g7+ iha ona lisoens ho experiéncias** natón hodi kontrola rasik ita-nia destinu. Ita labele hein tan ona solusoens husi li'ur ne'ebé dala barak la tuir ita-nia realidades. **Ita-nia forsa boot liu mak solidariedade entre ita-nia estadus-membrus** — unidade ida ne'ebé harii iha ita-nia luta hamutuk, reziliénsia ho aspirasaun kolektiva ba paz ho estabilidade.

Nune'e, mak ha'u hakarak propoin **pontu-de-asaun prinsipál tolu** hanesan ita-nia roteiru kolektivu hodi tranxende (ka ultrapasa tiha) retórica no kria impaktu ida ne'ebé real no ba tempu naruk iha ita-nia povo sira-nia moris:

**Primeiru:** dékadas konflitu ho funu husik hela divizoens sosiais polítikas ne'ebé kle'an lahalimar iha ita-nia paizes. Divizaun hirak-ne'e la'ós de'it hanesan rezídius (ka buat

restu sira) husi pasadu, maibé hanesan ku'ak boot sira ne'ebé ema aproveita hodi halo funu, no transforma ita-nia nasaun sira hanesan kampus-de-batalha ba intereses husi li'ur. Kanek boot sira ne'ebé seidak fitar sai hanesan ambiente di'ak tebes ba konflitu sira ohin-loron, hodi husik siklu violénsia ne'e nafatin husi jerasaun-bajerasaun. Se ita la haree didi'ak ba divizaun hirak-ne'e no ita servisu hamutuk ba rekonsiliaun jenuíjna, mak paz ne'e sei kontinua frájil no instabilidade mós sei la lakon.

Tanba ne'e, ha'u husu atu ita halo maka'as tan esforsus atu promove diálogu nasionál ho rekonsiliaun hanesan dalan úniku no sustetntável ba rezolusaun konflitus. **Kura mak tenke katuur uluk liu polítika.** Ita sira-ne'e, nu'udar membrus g7+, ita iha autoridade moral ho experiénsia rasik atu defende rekonsiliaun — la'ós hanesan agenda ne'ebé impoin husi estranjeiru sira, maibé hanesan prosesu esensial ida ne'ebé lidera husi ema sira ne'ebé liu ona husi funu no hatene ninia konsekuénsias.

Ita iha kbiit atu halo ida-ne'e tanba ita-nia asoens ne'e hetan kbiit husi solidariedade, la'ós tanba intereses polítikus ou ekonómikus. Ita la mai iha-ne'e atu dita ka hanorin kona-ba solusoens, maibé atu ita hamutuk hanesan parseiru ba paz.

Ha'u apela ba Nasoens Unidas atu rekonhese no apoia misaun ida-ne'e. Hamutuk, ita propoin ba Sekretáriu-Jerál ONU atu nomeia envidu espesial ida ba g7+ — envidu ida ne'ebé bele servisu ho ita hodi promove rekonsiliaun, halo mediasaun ba konflitus no tulun hapara funu iha fatin ne'eb'e de'it.

**Ne'e la'ós de'it hanesan proposta ida; ne'e nesesidade urgente ida atu evita ita hela ba kotuk.** Se mundu hakarak tebes duni paz, entaun tenke investe iha diálogu no rekonsiliaun, einvezde iha jestaun no kontensaun (ka kontrola) konflitus. Mai ita kaer rasik lideransa atu ida-ne'e bele akontese.

**Segundu:** maski ita hetan rótulu (ka, marka) hanesan "frágeis", ita-nia paíz sira neon mós matenek no ho experiénsia ne'ebé bele inspira reformas boot iha konstrusaun Estadu no lisaun sira ne'ebé ita aprende nia valór boot lahalimar.

Ha'u kongratula g7+ tanba bele hola insiativa hodi halibur profisionais husi estadus-membrus hodi elabora estrutura aprendizajen entre pares. Estrutura, ne'ebé diskute tiha ona iha Abu Dhabi (no sei diskute hanesan parte husi agenda reuniaun ne'e), iha potensial atu sai hanesan ita-nia modelu hodi molda (ka transforma) políticas, hametin instituisoens no orienta ita-nia trabalhu advokasia iha panorama global. Einvezde ita depende de'it ba modelus husi li'ur ne'ebé la refleto ita-nia realidades, ita bele utiliza ita-nia konhesimentu kolektivu hodi hato'o solusoens ne'ebé bele funciona ba ita hotu.



Agora, mais duke nunka, ita tenke fiar iha ita-nia matenek rasik hodi hatudu dalan ba oin. Mai ita aproveita biban ida-ne'e hodi transforma ita-nia experiéncias hamutuk sai ba forsa boot ida ba mudansa, atu nune'e iha future ita bele hadi'a konstrusaun paz, governasaun no desenvolvimentu sustentável iha ita-nia nasoens.

**Terseiru:** comunidade internasionál, atu doadores tradicionais ka potenciais globais emergentes, tenke haree ita hanesan parseirus ba prosperidade hotu-hotu nian no hanesan ponte ida ba mundu ne'ebé moris hakmatek no dame. Labele ona haree Estados frájeis hanesan destinatáriuus perpétuus (ka, permanentes) atu simu ajuda, maibé, investe iha ita-nia reziliénsia. g7+ ida ne'ebé estável liu signifika menus krizes, menus funu no ikusliu, menus nesiedade atu husu ajuda internasionál. Einvezde reaje hasoru konfliktus depoizde nakfera, tenke investe ba prevensaun funu molok hahú. Nasoens Unidas ho instituisoens multilaterais tenke mós rekonhese ita-nia matenek no simu ita-nia experiéncias iha sira-nia polítikas. Estadu frájil sira la'ós de'it hanesan intervenientes pasivus iha sistema internasionál; ita iha konhesimentus ne'ebé bele kontribui ba esforsus globais kona-ba konstrusaun paz.

**Kuartu no ikusliu:** Ha'u husu ba estadus-membrus g7+ atu mobiliza kapitál polítiku no investe hodi haforsa ita-nia kauza kolektiva. **g7+ ne'e harii ho baze iha solidariedade, prinsípiu ida ne'ebé dala barak ema haluha ou rejeita husi especialistas tradicionais iha relasoens internasionais.** La hanesan ho aliansa sira ne'ebé harii tanba konveninénsia polítika ou kompetisaun estratéjika, ita-nia unidade ne'e nia abut metin iha ita-nia luta hamutuk ba paz, estabilidade ho autodeterminasaun.

Ita iha potenciál atu salvaguarda paz iha ita-nia países, reziste hasoru interferénsia husi li'ur no labele husi ita-nia nasaun sira sai nafatin hanesan kampus-de-batalah (ka fatin funu) tanba rivalidades ejemónikas. Mundu oihin-loron fahe malu ba blokus, maibé atu labele husik dada ita hadau malu poder, ita iha oportunidade atu forma buat ketak ida — **bloku ba paz.**

Ita hatudu tiha ona katak solidariedade bele hakat liu jeografia, polítika ho istória. Husi África mai Pasífiku, husi Médiu Oriente mai Ázia, husi Karaíbas, g7+ halibur países husi diferentes orijens ho vizaun ida de'it: katak frajilidade la'ós hanesan destinu ida, maibé dezafiu ne'ebé ita tenke ultrapasa.

Karik ita bele hametin ita-nia unidade, mak ita bele reformula debate global kona-ba konstrusaun paz. Einkuantu sira seluk forma blokus ba funu, ita bele hatuur-an hanesan bloku ida ba paz. Einkuantu poténsias globais buka divizaun, ita bele oferese ezemplu di'ak ida kona-ba kooperasaun hakat liu fronteiras. Einkuantu Estadu frájil sira istorikamente ema haluha ou utiliza ba ganhus (ka, benefisius) estratéjikus, ita bele ezije mós ita-nia direitu hanesan parseirus iha konstrusaun mundu ida ne'ebé justu no moris hakmatek liu.

Mai ita aproveita momentu ida-ne'e, la'ós de'it ba ita, maibé ba jerasoens aban-bainrua. g7+ bele sai hanesan farol esperansa iha mundu ida ne'ebé hetok nakonu

ho divizionizmu. Maibé atu konsege ida-ne'e, ita presiza kompromete-an, investe no halo asaun hamutuk.

Exelências,  
Senhoras no senhores,

Mundu agora fahe malu aat liután, ho divizoens globais ne'ebé kle'an no konflitus entre poderozus remodeladores panorama geopolítiku. Hanesan istória hatudu ona mai ita, bainhira poténsia boot sira tama iha konflitu, sira ne'ebé vulneráveis liu mak terus boot liu. Dala ida tan, ita haree funu ne'ebé ema halo, la'ós de'it iha kampus-de-batalha, maibé liuhusi koersaun ekonómika, interferénsia polítika ho konflitus tanba prokursaun, ne'ebé barak mak akontese iha ita-nia países rasik.

Ita-ia enkruzilhada (ka kruzamentu). **It abele hanesan de'it observadores passivos, tuir de'it forsas globais ne'ebé ita labele kontrola, ou ita bele hamriik hamutuk, unidus no determinadus, hodi proteje ita-nia nasaun rasik husi kanek tanba funu ho moris-kiak.**

Ita mak hili rasik.

g7+ iha ita-nia liman — plataforma ida ne'ebé harii ho baze iha solidariedade, iha reziliénsia no iha fiar metin katak paz ne'e bele hetan.

Ha'u hein ho laran tomak atu reuniaun ida-ne'e ho diskusaun sira ne'ebé sei halo iha loron rua laran, bele hatudu dalan loloos no desizivu atu ita tuir — dalan ida ne'ebé bele lori ita-nia nasaun tuir dalan ba paz rohan-laek, ba estabilidade no ba auto-sufisiénsia.

Ha'u dezeja buat hotu di'ak iha ita-boot sira-nia empreendimentus. Mai ita halo istória hamutuk.

Obrigadu wa'in.  
Kay Rala Xanana Gusmão